

## **Bortaduras mesi de Ladàmini 2022 – Ottobre 2022**

**03/10/2022**

### **SCÈBERU PO S'ASSUNTZIONI A TEMPUS PRENU E INDETERMINAU DE UNU ELETRICISTA.**

Su Comunu de Santu Giuanni Suèrgiu fait sciri ca at publicau s'avisu pùblicu po su scèberu de unu operaju a tempus prenu e indeterminau chi tèngiat sa cualìfica de "Elettricista e installadori de impiantus elètricus in fàbricus tzivilis".

Càstia innoi s'avisu pùblicu <https://bit.ly/3SOuhk3>

Titulu de stùdiu: scola de s'òbligu (licèntzia mèdia)

Patenti: patenti de categoria "B"

Acabu po sa presentada de is dimandas:

de su 2 de donniassantu 2022 fintzas a is 14:00 de su 8 de donniassantu 2022. Is interessaus chi tèngiant is rechisius podint intregai sa dimanda online in su situ [www.sardegnalavoro.it](http://www.sardegnalavoro.it) andendi me in s'àrea personali cosa insoru me in sa setzioni "Serbìtzius online".

Po sciri cumenti s'ant a fai is acumprimentus de sa protzedura si podit cuntatai s'ASPAL a su 070 7790900 o [aspal.registrazionesil@aspalsardegna.it](mailto:aspal.registrazionesil@aspalsardegna.it) e su centru po su traballu de Carbònia.

Ligi innoi s'avisu <https://bit.ly/3e2PI2>

**03/10/2022**

### **AVISU: AGIORNAMENTU DE S'ALBU DE IS PRESIDENTIS DE SÈGIU ELETORALI.**

Su Comunu de Santu Giuanni Suèrgiu avisat totu sa populatzioni ca at publicau s'avisu po annoai s'albu de is Presidentis de sègiu eletorali. Totus is chi tenint is rechisius podint fai dimanda cumpilendi su mòdulu alliongiau me innoi <https://bit.ly/3SPbWDv> intre su 31 de ladàmini 2022. Chini est giai in sa lista ma si bolit scancellai agatat su mòdulu de intregai intre sa matessi dii.

03/10/2022

Un àteru atobiu de sa rassinnia literària #IoLeggo cun s'agiudu se s'ACLI S.G.S.

Sàbudu 15 de ladàmini 2022 a is 18:30 in s'Aposentu de su Consillu Comunali de bia Roma, in Santu Giuanni Suèrgiu

Eus a arriciri Pepi Coròngiu cun s'ùrtimu romanzu cosa sua *S'intelligèntzia de Elias*".



**Pepi Coròngiu**  
presentat  
**S'intelligèntzia**  
de **Elias**

**Presentat e ghiat**  
**Guido Cadoni**

**Pigant parti:**  
Sa sindiga **Elvira Usai** e s'assessori a sa  
cultura **Marco Zusa**

**Mùsica de Natascia Capurro in Etno**  
**Jazz**

**Sàbudu 15 ladàmini**  
**h 18:00**

**Aposentu de su**  
**Cunsillu Cumunali**

**bia Roma**  
**Santu Giuanni Suèrgiu**



ACLI S.G.S. a.p.s.

**Io Leggo**  
2022

Ita chi in logu de sa Giunta e de su Cunsillu Regionali nci fessat unu programa de intelligèntzia artifiziali po fai unu governu neutrali, produtivu e prus bonu! Sa Sardinna de s'annu 2030 at bintu su Covid e andat faci a su benidori in s'interis de una rivoluzionu tecnologica de s'intelligèntzia artifiziali. Unu giornalista falliu, Elias Dessanay, depit scruculliai sa morti strambeca de una picioa agatada bocia me in unu sutapassàgiu de s'asse medianu, in Casteddu. Est unu viàgiu in sa Sardinna de crasi aundi cun sa distopia si cantant is speras e is strobos de oi.

Pepi Coròngiu est nàsciu in Laconi (Or) in su 1965 e bivit in Casteddu de tempus meda. Est unu personàgiu de importu in su campu de sa linguistica e de is movimentus de s'identidadi sarda. At pigau parti a assòtzius medas e s'est ocupau, cumentu de responsàbili, de sa politica linguistica e regionali de su 2004 a su 2014. Est dirigenti de sa Pùblica Amministratzioni, giornalista, tradusidoru, iscrittori de òberas politicas e de sàgius asuba de s'amparu e s'avaloramentu de is linguas minoritárias. Custa est sa segunda faina cumentu de autori de romanzus in lingua sarda apustis de "Metropolitània e àteros contos tòpicos, distòpicos e utòpicos", de su 2019.

**03/10/2022 – 04/10/2022**

**Mesi de ladàmini.**

Est arribau su mesi de ladàmini de 31 diis. Est su primu mesi chi si fait a cumprendi ca s'istadi est spaciada e s'aria puru tenit unu fragu diversu, su fragu de s'otòngiu e de su ladàmini puru. Ma c'intrat calincuna cosa cun su ladàmini, su chi faint is pegus? Ellus! Ant sceberau custu nòmini pròpiu po ita nci ghetànt su ladàmini me in is campus po ddus alladaminai. Si pentzat ca ndi arribit de su fueddu assiru (w)alādum chi bolit nai fai nasci, e est pròpriu cussu chi fait su ladàmini a sa terra: dda fecundat e dda agiudat a fai cresci e nasci is prantixeddas. Is latinus dd'iant strupiau su fueddu assiru e dd'ant cunfùndiu cun laetus e iant scritu laetamen. Un'àtera teoria narat ca nd'arribit de sa paràula latina litatio – litationis, ca bolit nai sacrifictziu po ita fiat puru su mesi anca faiant sacrifictzius po pediri un'annada bella. Custu mesi tenit prus nòminis: Santuaini (Santu Gavino, ca si afestat su 25/10) Santu Sadurru (Saturno) e Santu Miali (San Michele) in sa Sardìnnia centrali.



**05/10/2022**

Primu parti de sa bortadura de su fumetu “Abba e Nurik contant”, fatu gràtzias a is contus de is studentis de Domusnoas, Santu Giuanni Suèrgiu e Masainas me in s'annu 2018. Sa consulèntzia stòricu-archeològica dd'ant fata Ivan Lucherini e Andrea Coffa. Ant pigau parti s'Associatzioni “Quadrifoglio '95” e s'Associatzioni “Circhiola”.

**05/10/2022**

Si fait sciri ca s'atòbiu nomenau “**Puliamo il mondo**” ca depiat essi fatu su 30 cabudanni est stètiu perlongau a cenàbara su 7 de ladàmini

**05/10/2022**

1° mosta / amostu de sa lepa

Santu Giuanni Suèrgiu

8 ladàmini 2022

Ex Esmas

Bia G. di Vittorio a fiancu de su stàdiu

De is 10:00 a is 13:00

E de is 16:00 a is 20:00

Sàbudu 8 de làdamini de is 10:00 de mengianu tocai, benei-ddoi a s'ex Esmas (cussu a fiancu de su stàdiu me in bia G. Di Vittorio) ca nc'at a essi una mosta de sa lepa apariciada de s'ACLI S.G.S., de su Comunu e de sa Proloco de Santu Giuanni Suèrgiu. Nci ant a essi is maistus de gorteddus ammostendi lepas e arresòias prexaus de fai connosci a sa genti cumentu totu faint po ddas fabricai. Unu traballu stentosu meda chi ndi fait nasci gorteddus de bisura artìstica!

Pro Loco San Giovanni Suergiu

Comune di San Giovanni Suergiu

Gruppo "Le Moste Amiche" San Giovanni Suergiu

APARICIANT SA

**1° MOSTA DE SA LEPPA**

**SANTU GIUANNI SUÈRGIU**  
**8 LADÀMINI 2022**

EX ESMAS  
BIA G. DI VITTORIO A FIANCU  
DE SU STÀDIU

INTRADA LIBERA!

DE IS 10:00 A IS 13:00  
E DE IS 16:00 A IS 20:00

UFÌTZIU DE SA LÌNGUA SARDA  
SANTU GIUANNI SUÈRGIU

**AUTOPESCHERIA FISH GREGORY**  
FRIGGITORIU E PISCU NALLA GRIGLIA  
☎ 3498687155

**Stemami**  
L'esperienza s'arrazza  
tuttu cù c'arrazza  
SANTU GIUANNI SUÈRGIU

**UnipolSai**  
ASSICURAZIONI  
di Saiu & Tatti

**BACCAMORA**  
di Patrizia Orrù

**10/10/2022**

**MESURA REGIONALI NOMENADA REIS (RÈDDITU DE INCLUSIONI SOTZIALI) – ANNUALIDADI 2021, SEGUNDA PARTI. APROVU LISTA DE IS DIMANDAS LÒMPIAS IN AUSTU 2022.**

Si fait sciri ca, cun determinu n. 449 de su 04/10/2022 su Comunu de Santu Giuanni Suèrgiu at aprovau sa lista de is dimandas lòmpias in austu 2022 po pediri sa misura nomenada REIS. Si amentat ca funt ancora abertus is tèrminus po sa presentada de is dimandas po tenni su REIS – segunda parti, chi previdit unus cantus de mesuras econòmicas po is famìlias chi non tenit is titulus po pediri su REIS – primu parti e su RDC (rèditu de cidadinantzia) o atras formas de agiudu. Custas famìlias si depint agatai in stadu de incòmudu sotziali e econòmicu po mori de su Covid opuru funt cussas chi pregontant po sa primu borta a is Serbìtzius Sotzialis.

Po fai dimanda de ammissioni tocat a cumpilai su mòdulu approntau de s'Enti e a ddu intregai a s'Ufìtziu Prìsia de su Comunu o a ddu imbiai de calisiat mail a

[ufficio.protocollo@pec.comune.sangiovannisuergiu.ci.it](mailto:ufficio.protocollo@pec.comune.sangiovannisuergiu.ci.it) chi tèngiat cumenti de titulu: RICHIESTA DI ACCESSO ALLA MISURA REGIONALE DENOMINATA REIS 2021 PARTE SECONDA.

Po informatzionis a minudu ligei s'avisu pùblicu e is paperis sighendi custu acàpiu:

<https://bit.ly/3rGJSqn>

Po is paperis alliongiaus: <https://bit.ly/3SKYINY>

**10/10/2022**

**DII DE SU CHIP**

Sàbudu 15 de ladàmini 2022

Me in s'ex Esmas (a costau de su stàdiu comunali) in bia G. di Vittorio, 31, de is 09 oras de mengianu fintzas a sa una: totus is meris chi depint iscriri is canis cosa insoru a s'anàgrafe canina depint arregolli sa carta de identidadi e su còdixi fiscali pròpiu o tèssera sanitària. Po atras informatzionis tzerriai a su nùmeru 3497423086

**12/10/2022**

**ALLERTA COLORI ARÀNGIU**

Si fait sciri a totu sa populatzioni ca de is primus oras de su mengianu de oi, 12 làmpadas 2022, me in su territòriu de Santu Giuanni Suèrgiu nci ant a essi tempus malu meda po nexi de una temporada lègia chi arribat de sud-ovest. Si incumandat de donai atenzioni meda chi si depeis movi a calincuna parti.

Su Tzentru Funzionali Detzentrau de sa Protetzioni Tzivili at publicau unu avisu de crititzidadi po condizionis de tempus malu, bàlidu po totu sa dii de oi, 12 làmpadas 2022, de is 08:00 a is 23:59.

Po totu sa dii de oi, mèrculis 12 de làmpadas 2022, totu sa Sardìnnia at a essi interessada de proina e temporadas chi podint essi malas meda, isuladas me in cabu de susu e spartas me in is atrus logus. Est a nai ca si at a pòdiri arribai a tenni prus de 30 mm de àcua in una ora. Impari a is temporadas nci at a poi essi cropus de bentu forti e landireddu puru.

**12/10/2022**

**GIUAMENTU TARI PO STUDIANTIS UNIVERSITÀRIUS FORAS DE SEDI, ONLUS E ODV**

Su Comunu de Santu Giuanni Suèrgiu fait sciri ca cun deliberatzioni de su Consillu Comunali n. 20 de su 23/05/2022 ant previdiu sa possibilidadi de:

Fai redutzionis de sa TARI po is famìlias chi tengant una persona chi stùdiat a foras de su territòriu comunali.

Dispensai de su pagamentu de sa TARI is assòtzius ONLUS cumenti narat su D. Lgs. 460/1997 e is ODV cumenti narat su D.Lgs.117/2017 (art. 17 BIS Regulamentu TARI). Totus is chi bolint gosai de custus giuamentus depint cumpilai su mòdulu chi agatant me in <https://bit.ly/3MqyF6P> e ddu depint intregai a s'Ufitziu Tributus. Po calisiat informatzioni tocat a preguntai a s'Ufitziu Tributus in custus oràrius:

Lunis a merì de is 16:00 a is 18:00

Mèrculis a mengianu de is 10:00 a is 12:00

**12/10/2022**

**SERBÌTZIU LÀMPADAS VOTIVAS**

Su Comunu de Santu Giuanni Suèrgiu fait sciri ca intre su 30 de donniasantu si poit pagai su cànoni po su serbìtziu de is làmpadas votivas de s'annu 2022.

Po connosci is maneras de pagamentu castiai beni custu immàgini. De su 10 de ladàmini s'Ufitziu Tennicu nd'at tirau su serbìtziu a is chi non ant pagau po s'annu 2021.

**17/10/2022**

**ASSEGNATZIONI DE IS CONTRIBUTUS PO SU SUSTENNU A S'ALLOGU (CONTRIBUTUS PO S'AFITU) CUMENTI NARAT SA LEI 431/98 ART. 11. PERÌODU GENNÀRGIU - DONNIASANTU 2022. PRESENTADA DE IS DIMANDAS INTRA E NO AVATU DE SU 14/11/2022.**

Su Comunu de Santu Giuanni Suèrgiu fait sciri a is tzitadinus interessaus ca cun su determinu n. 472 de su 13/10/2022 at aprovau s'avisu pùblicu e is mòdulus po fai sa dimanda e pediri is contrinbutus nominaus a susu. Is dimandas tocat a ddas portai a manu a s'Ufitziu Prisia intra e no avatu de su 14/11/2022 opuru a ddas imbiai po e-mail a s'indiritzu

[ufficio.protocollo@pec.comune.sangiovannisuergiu.ci.it](mailto:ufficio.protocollo@pec.comune.sangiovannisuergiu.ci.it) ponendi totu in unu ùnicu file PDF

(dimanda impari a is paperis de ponni de manera obligatòria) e scriendi me in s'ogetu " Domanda ammissione contributi canoni locazione anno 2022". Si cunsillat de si marcai su nùmeru de prisia chi ant a donai una borta presentadas is dimandas, de manera chi s'at a podi castiai sa graduatòria.

Po ligi àteras informatzionis e castiai is paperis e su mòdulu:

<https://bit.ly/3s2rpVC>

**17/10/2022**

**CUNZESSONI PO S'IMPREU DE SA PALESTRA COMUNALI, STASONI 2022/2023. AGIORNAMENTU DE SU CALENDÀRIU SEMANERI**

Si fait sciri ca cun su determinu n. 466 de s'11/10/2022 s'Ufitziu Sport at aprovau s'istrutòria de is dimandas arribadas a pustis de su 30/06/2022 e at fatu una retifica partziali e una integratzioni de su calendàriu semaneri.

Innoi agatais alliongiau su calendàriu postu a dii (aggiornato) anca nci funt ancora is diis e is oràriu sbuidus chi si podint pigai.

Si amentat ca, cumenti si contat me in s'avisu pùblicu, sa cuntzessioni de impreu de sa palestra comunali – po is assòtzius bincidoris e po is amitius – at a arribai a pustis chi s'Ufitziu Tènnicu Comunali donat su permissu (nulla osta). Àteras informatzionis

<https://bit.ly/3rYIJMj>

**19/10/2022**

**BUSSAS DE STÙDIU COMUNALI PO STUDIANI DE SCOLA SEGUNDÀRIA DE 2<sup>^</sup> GRADU – ANNU SCOLÀSTICU 2021 – 22. PRESENTADA DE IS DIMANDAS DE SU 26/09/22 a SU 26/10/22.**

Su Comunu de Santu Giuanni Suèrgiu fait sciri ca ant publicau s'avisu po presentai is dimandas de is bussas de stùdiu po is studiantis de is scolas segundàrias de 2<sup>^</sup> gradu po s'annu scolàsticu 2021-22. Tocat a portai is dimandas a s'Ufitziu Prìsia o a ddas imbiai a sa mail [ufficio.protocollo@pec.comune.sangiovannisuergiu.ci.it](mailto:ufficio.protocollo@pec.comune.sangiovannisuergiu.ci.it) intre de su 26 ladàmini 2022. Càstia innoi po s'avisu e is mòdulus:  
<https://bit.ly/3eBU2WE>

**19/10/2022**

**RICURRÈNTZIA DE TOTUS SANTUS E ARREMONAMENTU DE IS MORTUS**

Cuntzessioni de is tretus acanta de su campusantu po sa bèndita de froris e prantas. Sa Responsàbili de s'Ufitziu Atividadis Cummertzialis fait sciri a totus is interesaus chi, sighendi is diretivas de sa Giunta Comunali in s'interis de sa delìbera n. 67 de su 17/10/2022, cun pròpiu atu de su dirigenti at aprovau s'avisu po sa "Manifestatzioni de interessu po s'emissioni de sa cuntzessioni temporànea po sa bèndita de froris e prantas anca de su campusantu de Santu Giuanni Suèrgiu, po sa ricurrèntzia de Totus Santus e arremonamentu de is mortus, perìodu de su 28 de ladàmini a su 28 de donniasantu 2022". Is interesaus point castiai su bandu alliongiau e fai dimanda sighendi cun atenzioni meda is inditus

**24/10/2022**

**DERETU A SU STÙDIU 2022**

Si fait sciri ca sa Regioni Sardìnnia at ativau is inerventus afatantis po su deretu a su stùdiu 2022 po is studiantis:

- bussa de stùdiu regionali (annu scolàsticu 2021/2022) po is studiantis de is scolas pùblicas primàrias e segundàrias de 1<sup>^</sup> e 2<sup>^</sup> gradu (francu de is benefitziàrius de sa Bussa de Stùdiu Natzionali 2021/2022) chi faint parti de una famiglia chi tengat unu I.S.E.E. bàlidu po custu annu – cunforma a su D.P.C.M. n° 159/2013 – prus bàsciu o uguali a € 14.650,00.

Bonus librus (annu scolàsticu 2022/2023) po is studiantis de is scolas segundàrias de 1<sup>^</sup> e 2<sup>^</sup> gradu, chi faint parti de una famiglia chi tengat unu I.S.E.E. bàlidu po custu annu – cunforma a su D.P.C.M. n° 159/2013 – prus bàsciu o uguali a € 20.000,00.

Tocat a intregai is dimandas a manu a s'Ufitziu Prìsia de su Comunu de Santu Giuanni Suèrgiu, opuru po mail a s'indirìtzu [ufficio.protocollo@pec.comune.sangiovannisuergiu.ci.it](mailto:ufficio.protocollo@pec.comune.sangiovannisuergiu.ci.it)

SCADÈNTZIA PO SA PRESENTADA DE IS DIMANDAS: mesunoti de su 4 de donniasantu 2022.

Po àteras informatzionis:

<https://bit.ly/3gBl8xn>

**24/10/2022**

Tzia Antioca Serafini, cida passada, at cumpriu 102 annus! Arratza de cosa bella, unu privilegiu arribai a custa edadi cun sa gana bella de Tzia Antioca! Totu sa bidda de Santu Giuanni Suèrgiu e totu s'Amministratzioni dd'ant afestada e ddi faint is norabonas! Retratu de sa pàgina Facebook Comune di San Giovanni Suèrgiu

**24/10/2022**

**BUSSA DE STÙDIU NATZIONALI – annu scolàsticu 2021/2022**

Aprovu de sa lista de is benefitziàrius

Si fait sciri ca sa Regioni Sardìnnia at aprovau sa graduatòria ùnica regionali de is bussas de stùdiu po s'annu scolàsticu 2021/2022 po is studentis cun unu ISEE fintzas a € 7.875,00. Càstia innoi po biri sa lista de is beneficiàrius de su comunu cosa nostra:

<https://bit.ly/3SsXQHy>

Su pagamentu at a podi essi arregotu in calisiat ufiziu postali. A is beneficiariis ddis ant a donai € 200,00.

Is datas de su pagamentu s'ant a pòdiri castiai in su situ "IO STUDIO".

## 25/10/2022

Ddu scias ca sa Sardìnnia puru tenit sa varianti sua de Halloween? Est unu costum chi ndi benit de s'edadi nuraxesa chi assimbillat, po calincuna cositedda, a sa festa stràngia: su scuriu e una crocoriga sboida cun una luxi a intru, nomenada "Sa conca 'e mortu", prus che totu me in is biddas de cabesusu. Su sinnificau est cussu de nci stesiai sa morti e de no dda timi e de dda biri cumentis de una fasi chi arribat a pustis de sa vida. No est una cosa noa, berus?

T'amentat calincuna atra cosa? Dda faint puru me in s'Amèrica Latina e massimamenti in Mèssicu, una festa cun una grandu mìscia de coloris, mùsica, cosa de papai e de buffai. Ddis cuncordant puru su lettu, a is mortus, aundi dromiant!

In Sardìnnia tocat a nai ca po primu cosa si scerant is ànimas malas de is bonas, ca is primas podiant donai agiudu e aprigu, e is segundas tocàt chi abarressint atesu. In totu s'ìsula is pipius fiant is protagonistas de sa matessi costumàntzia chi pigat nòminis diferentis de parti a parti: Is Animeddas, Is Panixeddas, Su Prugadòriu, e Su Mortu Mortu. Su meri de su 1 e su 2 de donniasantu is piciocheddus de sa bidda bistius de tzapus (no poita si mascherant ma poita fiant pòburus diaderus) andant po is domus cantendi imbalapipius in sardu e pedendi cosa po is ànimas in pena de su purgadòriu. Is meris de is domu ddis donant arenada, castàngia, mèndula, nuxi, nuxedda, pani de sapa, pabassinus e ossus de mortu.

Un'atera costumàntzia es sa de lassai, sa noti de su 31 de ladàmini, sa "cena po sas ànimas", unu pratu de cosa de papai (poditnat essi malloreddus cun bagna, binu e pani) po donai a papai su mortu chi torràt a domu sua. Tocàt perou a no lassai gorteddus in sa mesa: ita chi arribat un'ànima mala invecias? Toca! Custu ddu narat sempri ajaja mia, ca ddu fadiant in domu me in is annus 30 e 40...ita pecau ca custu costum est andau pèrdiu!

## 26/10/2022

Ddu scias ca su 29 de ladàmini fut una dii chi at mudau po sempri su mundu? Podeus narri ca de insaras nc'est stètia una grandu rivolutzioni po su chi pertocat sa manera de circai informatzionis, de pentzai, de fai compras e de votai puru. Seus chistionendi de **internet**! Sa noti de su 29 de ladàmini 1969 unu studente de s'Università de sa Califòrnia iat imbiau su primu messàgiu virtuali de unu computer me in Los Angeles a unu de s'Università de Stanford, a 500 chilòmetrus atesu. Est inghitzada aici sa stòria de s'ARPANET (nareus ca fiat s'ajaju de internet cummenti ddu conosceus oi), unu progetu finantziau de su Dipartimentu de sa Defensa americanu. A printzìpiu serbiat po si scambiai messàgius e informatzionis a palas de sa Rùssia, luegus, si funt collegaus àterus entis e universidadis fintzas a s'essi fatu s'internet chi totus conosceus e imperaus oi. Nara, e tui ti dd'imàginas una vida chentza de internet, chentza de podi circai totu cussu chi ti parrit e praxit me in su telefoneddu o me in su computer?! Si no ci fessit non iat a essi possìbili nimancu a ligi totus is cositeddas chi scrieus nosu.





**26/10/2022**

Oi inghitzat su de ùndixi mesis de su calendàriu, **Donniasantu**. Is nòminis de is mesis in Sardìnnia funt acapiaus a su mundu de sa messaritzia e de sa pastoritzia impari a is festas pagànas suspidas de su Cristianèsimu e cun totus is fainas de sa vida de bidda (binnenna, seminadura e arregorta). Su nòmini Donniasantu (imperau prus che totu in su sud de s'ìsula) pertocat s'amentu de totus is santus. Me in su nord, invecias, custu mesi est nomenau Sant'Andria, ca si afestat su 30. In calincuna bidda cummenti de Bono, Otieri e Paulle si faiant prucessionis cun crocorigas tacheddadas, chi fiant su sìmbulu de s'atòngiu e si tacheddànt po afestai is ànimas de is mortus.

Sant'Andria: calinunu studiosu pentzat ca su nòmini Sant'Andria ndi bengat de una sturpiadura de sa lingua sumera antiga chi boliat nai "celu" e "sciundi", est a nai ca Donniasantu est su mesi chi de su celu ndi calat àcua meda ca ndi satzat is sartus apenas alladaminaus e ghetau sèmini. Un'àtera teoria narat ca Sant'Andria est sa versioni cristiana de Dioniso, e iat a essi su deus de su binu casi ca in Garteddi in custu mesi si stupant is carradas. Me in Otieri puru si afestat "su trinta 'e Sant'Andria" innui is meris de is bìngias aberriant is magasinus cumbidendi is paisanus e is stràngius. Me in Bono puru impari a sa prucessionis cun is crocorigas tacheddadas nc'est su cumbidu de su binu nou.

Santu Sadurru: in su trettu de Casteddu custu est su mesi de su patronu (San Saturnino ) ca si afestàt su 23 de donniasantu. In su 1621 su arciovispu Francisco D'Esquivel dd'iat movia a su 30 de ladàmini, dii de festa cummenti dda connosceus oi. Po custa arrexioni su mesi de Donniasantu fiat connotu cun su nòmini de Santu Sadurru.

E a bosàterus, si praxit su mesi de donniasantu?

**26/10/2022 - 02/11/2022**

Torrat sa rassìnnia literària #ioLeggo, cun s'agiudu de s'ACLI S.G.S, no si ddu stramancheis!

Sàbudu 5 donniasantu, a is 6 de meri

Aposentu de su Consillu Comunali, Santu Giuanni Suèrgiu

Igor Melis at a presentai su primu romanzu cosa sua "Sa crai".

Igor Melis presentat

Sa crai

Ghiat Guido Cadoni

Leturas interpretativas Gaetano Marino

Cummentu musicali Andrea Lai e Pasquale Sollai

SÀBUDU, 5 DONNIASANTU 2022 me in s'apostu de su consillu comunali, santu Giuanni Suèrgiu

Giginu Buttinu est unu òmini de setant'annus cun unu caràteri forti, e chi tenit ancora calincuna cosa de sboddicai in su mundu. Bivit in localidadi Su Stiddiu, in su Comunu de Sanrocco, anca est incasciau su medau suu chi casi no si bit, cravau in mesu de sa baddi de Monti Nieddu. Tziu Giginu, aici ddu tzerriant, tenit grandu reverèntzia po cussu logu, chi a sa fini de is annus sesanta fut su centru de produsidura de is cosas de gherra de totu su Mediterràneu. Custa reverèntzia dd'ammostat circhendi sa beridadi in unu logu arricu gràtzias a sa fàbrica perou a dannu de su logu e de sa genti chi ddoi bivit.

Unu romanu chi fait pentzai gràtzias a s'onestadi e a sa fortilesa de un òmini chi no s'arrentit mancai arranchit me in is dificultadi e me in is arriscus. Giustìtzia, arrespetu, amistadi e sintzillesa funt is ingredientis de custa stòria contada de s'autori cun totu s'amori po sa terra sua. Igor Melis est nàsciu in Casteddu su 7 de ladàmini de su 1974 e at sempri biviu me in Santa Barbara (Sarroch) anca at imparau de sa famiglia sua s'amori po sa Sardìnnia e is tradizionis. Amantiosu de paesàgius e situs archeològicus, stòrias, contus e d'icius, arricius in erididadi de is mannus. Sa crai est su primu romanu cosa sua.



**Igor Melis presentat**  
**SA CRAI**

**IGOR MELIS**

**Sa Crai**

amicolibro

CRIME

**Presentat e ghat**  
**GUIDO CADONI**  
**Leturas interpretativas**  
**GAETANO MARINO**  
**Cummentu musicali**  
**ANDREA LAI e PASQUALE SOLLAI**

**SÀBUDU, 5 DONNIASANTU 2022**  
**a is 18:00**  
**Aposentu de su Cunsillu Comunali**  
**BIA ROMA**  
**Santu Giuanni Suèrgiu**

Giginu Buttinu est unu òmini de setant'annus cun unu caràteri forti, e chi tenit ancora calincuna cosa de sboddicai in su mundu. Bivit in localidadi Su Stiddiu, in su Comunu de Sanrocco, anca est incasciau su medau suu chi casi no si bit, cravau in mesu de sa baddi de Monti Nieddu. Tziu Giginu, aici ddu tzerriant, tenit grandu reverèntzia po cussu logu, chi a sa fini de is annus sesanta fut su centru de produsidura de is cosas de gherra de totu su Mediterràneu. Custa reverèntzia dd'ammostat circhendi sa beridadi in unu territòriu arricu gràtzias a sa fàbrica, perou a dannu de su logu e de sa genti chi ddoi bivit.

Unu romanu chi fait pentzai gràtzias a s'onestadi e a sa fortilesa de un òmini chi no s'arrentit mancai arranchit me in is dificultadis e me in is arriscus. Giustìtzia, arrespetu, amistadi e sintzillesa funt is ingredientis de custa stòria contada de s'autori cun totu s'amori po sa terra sua. Igor Melis est nàsciu in Casteddu su 7 de ladàmini de su 1974 e at sempri biviu me in Santa Barbara (Sarroch) anca at imparau de sa famiglia sua s'amori po sa Sardìnnia e is tradizionis. Amantiosu de paesàgius e situs archeològicus, stòrias, contus e d'icius, arricius in erididadi de is mannus. Sa crai est su primu romanu cosa sua.



ACLI S.G.S. a.p.s.

**lo Leggo**  
2022